

王焱 編

日本漢文學百家集
73



北京燕山出版社



王焱 主編

日本漢文學百家集
73



北京燕山出版社

第七十三册

讀耕先生全集 文集 卷七至卷十五 林春德著 寬文九年……………一

讀耕齋全集

文三

讀耕林先生文集卷第七

記上

甲州孝子事記

寬永十七年作

孝也者百行之先也爲人子者不可不知之焉殺身以求孝者吾於甲州孝子見之或曰否行險以徼幸也聞者甲州有兄弟其母沒父存其事父至矣而其家貧窶瓶無儲粟囊乏一錢旣無淡飯藜羹之可養况於三牲之養乎况於甘旨之奉乎而無奈之何痛哉斯人而有斯貧也一日兄弟相議

曰椿府在堂而不能養之非孝心之不足也家計之匱乏也哀哉吾聞耶蘇者國之大禁也有信之者則赤其族若有訴之者則有官賞吾請爲耶蘇汝往訴之得其官賞歸以養父不亦可乎若不然則椿府餒死吾與汝亦餒死與三死寧一死二生吾請死之弟曰吾死之君養之兄曰不然吾年已長汝尚少且椿府之於吾其愛薄椿府之於汝其愛厚薄愛者死而厚愛者養之則亦非所以孝於父乎吾請先死之於是其弟到江戶訴曰甲陽其

地有耶蘇敢以告之官乃以黃金數斤與之而去
官命急降乃捕其兄責之曰汝爲耶蘇乎曰然曰
何犯大禁乎曰信其道也吏士反接之詰責之且
問其師又問其徒曰師旣伏誅徒則無焉詰責愈
甚幾濱於死兄乃言曰吾真非耶蘇因告之故官
長慨然嘆曰孝哉孝哉然疑其猶爲虛僞也覈實
之於鄉里得其情而免之當斯時官長若執其自
欺欺人矯冒耶蘇之名以罪之則何得免刑乎崇
哉乎二子之孝可以嘉焉爲養其父不畏虔劉不

亦孝乎兄弟相讓其死不亦義乎兄以旣危之命而免歸與其弟共養其父不亦天乎皆是孝感之所爲也嗚呼二子之孝非獨光於我國亦何可愧于中華乎吾若修本朝孝子傳則其必不可棄二子也吾見世上之人有家貧賣親者有與父相惡者有殺父殺母者有母子聚廳者何其禮義之廢乎何其不孝之甚乎何其人倫之亂乎何其風俗之衰乎可以寒心可以酸鼻凡如此者豈不可負負於二子乎以彼比此則蘭艾同畝也雲泥萬里

也然二子之所爲亦不爲至孝也唯是殺身以求
孝者何則父母唯其病之憂况於死乎而今二
子乘一時之貧困憂奉養之不足故殺其身以欲
養之孝則孝也未爲盡矣當彼詰責之時兄或有
辭費或又有相怨相憎者則乘其費而以出入其
罪則兄死弟亦逢刑延及于父則不孝之尤也何
爲輕殺其身乎非行險以徼幸乎且夫古今之家
貧養親者多矣或有庸作者或有拾椹者或有奉
檄者或有汲江者皆各得其養也貧如顏曾之養

其為樂也大矣又何闕焉何為輕殺其身乎身體
髮膚不敢毀傷者孝經之文也父母全而生之子
全而歸之者孝道之要也樂正子春傷足有憂色
范子宣傷指大啼以此傷指傷足者小事也人之
所不可無之也而彼猶如此何為輕殺其身乎愚
昧之徒以人肉而為養親一時激發務為詭異以
驚世駭俗割股不已至于割肝割肝不已至于殺
子違道傷生莫此為甚是所以明太祖罪江伯兒
也是非行險以徼幸乎然二子者甕牖繩樞之子

編戶萌俗之民且又昧道懵學之人也故不知聖賢之至孝其所行如此惜哉雖然二子之孝自中心達於面目非敢枉情也非敢詐心也欲養父之意深切矣故不惜其死而已比之世上之人則豈同日之談乎可不褒賞之耶可不感歎之耶時維寬求萬年之十七年也吾耳斯言始而驚中而信終而感且見執法者有惻隱之心也但恐二子之芳名不傳而蕪沒也故叙其事以表白二子之情于當世且欲使梟鏡之徒有愧心於此也

河亭納涼記

寬永十七年作

有清閑丈人者苦炎熱之難忍厭矮屋之不可居
出自瓜廬藜杖吟步往到河邊一亭而納涼焉主
人歡迎即共登高亭窮千里目對多般景上見青
天之蒼蒼下臨清流之潺潺凱風自南吹我衣袵
嶺雪在西入我窓欄水面生紋群鷗蕭蕭波底浮
光遊魚發發既而主人設飡醉且吟詠飲且歌舞
且笑且樂以遊以敖踴躍焉洋洋焉座久主人再
舉觴進揖丈人曰樂乎今日之風流杜工部之越

女紅裙燕姬翠黛韓吏部之清砌千迴冷環再三
又何及之樂乎樂乎優游以卒歲賓主獻酬觥籌
交錯時有農夫操鋤過亭下者於是文人喟然而
長歎意如有不平之色乎主人問曰丈人何為歎
也有何不足乎為珍膳奇羹有不足歟絺綌蒙縵
無可衣歟抑為隆樓傑閣無可居歟嬌女妙娃無
陳前歟飲徒詩友有不多歟丈人徐對曰否子獨
不見彼農夫乎時維函鍾亢陽曬萬物萬物不可
逃清風無聲溽暑侵肌鹽汗交流喘息薄喉無奈

此苦熱當是時農夫手執耒耜腰插斧鎌于田于
畝深耕易耨汗滴禾下足沒泥中以奉其長上蓋
病於夏畦可知矣然長上猶驕侈之心不息欲利
之情尤深不賒瞻下民之艱苦只求倉廩府庫之
充實故命令如雷徵責租稅苛酷之吏聚斂之臣
驅促之附益之豐年富歲猶患未足以給其徵責
如彼大侵歲田無粒米畝無麥禾雖然徵責不已
益熾益昌遂至使農夫嫁妻賃子散其家產賣其
田器痛哉加之或繫囚之刑殺之或放逐之奴使

之法刑之嚴酷至于此豈不傷痛乎夫民以穀爲
天人亦無穀則死而今聚於斯歌於斯恣一己之
私快須臾之娛只以浮遊慢戲爲事言未嘗及穀
談未嘗及農不憫民勞不知民業妄奪民之天無
思無知放飯流歎開口虛談是豈人情也哉且又
近世上無圉空之恩復無扇暍之政故冤死者暍
死者充滿獄戶絡繹道路不亦痛乎是吾所以長
歎且有不平之色也嗚呼酷暑去矣涼風來亂政
變矣治教興則是吾上願也樂不可極樂極生哀

欲不可縱縱欲生災前訓在耳子之所樂在今日
乎紆朱懷金之榮結駟連騎之樂則貴介縉紳之
事也非吾所求焉主人大喜肅揆曰善哉言乎豈
意今日之宴會得聞稼穡之艱難微姬旦之無逸
則成王庸詎得知小人之所依而致大平耶幸此
小亭淒其以風屢或遇高軒過傳此事以為戒也

林下會逢記

寬永十
八年作

鴨氏記安元之火災而出自外山遊於東州夢有
一士人賞春陽之景愛紅紫之色步於原垆遊於